

山東通志

(九)



山東通志卷一百七十三

人物志第十一

通志十一之十四

國朝

沂州府

李應鳳字柱三日照人父璽性至孝順治辛卯舉人歷任蓬萊教諭安東衛教授語人曰寒儒事業惟陶成一二人物可以儲國用耳除浮梁縣未幾謝病歸出己資穿井以便汲施義地以葬貧者鄉人德之嘗客吳有以事求關說者啗以金力卻之祀鄉賢應鳳康熙十五年進士改庶吉士授編修纂修明史十八年充會試同考官升洗馬督順天學政絕苞苴嚴請託釐正文體振拔寒滯又請置學田以資膳養增生員額以廣進取時進諸生反復開導勸以讀書立品一時人士無不鼓舞向學既滿歲

聖祖以爲才復留任三年還朝晉庶子擢太常寺少卿旋升內閣學士以事罷歸三十年

車駕北征應鳳輸財助軍復親轉粟塞外以濟軍食蕩平錄功復原官踰年修永定河復改修南河四十二年事竣晉二階回籍卒

國史有傳

管廷鶚字士一莒州人父鎮字靜軒咸豐四年棍匪陳玉標煽亂莒南鎮以其迫於饑窘發藏粟以食之立散十一年捻匪北竄即村東影雞山結寨相保時有被掠逃出者給衣履而遣之全活無算廷鶚於光緒二年成進士改庶吉士散館授編修文學優長尤工楷法充壬午科湖北副考官得士稱盛旋任山西學政釐剔弊

端士論翦服洊升至太常寺卿署都察院左副都御史俱能稱職未幾以疾歿於署任兄廷獻字士修光緒九年一甲第三名進士翰林院編修現官直隸承德府知府

趙萬邦沂州人順治四年由行伍從征川楚僞國公王祥擁兵五萬入寇隨陽萬邦率健卒大呼陷陣斬獲無算五年僞總兵王名臣自川東率衆萬人水陸並進萬邦迎擊於順慶破之賊魁譚文獻攻蓬溪萬邦以輕騎襲之生擒文獻圍遂解六年征袁滔斬首數千九年平川前攻佛頭關選健卒五十名斬竹爲梯從間道趨關下扶梯蟻附上鼓勇衝殺乘勝逐北遂拔重慶渡江擊僞都督盧三斬獲甚衆餘黨乞降萬邦善撫士卒能以少擊衆積功授邊義府副將改川北鎮標副將

徐夢熊蘭山人父元勳康熙四十二年武進士由侍衛歷任山西平魯路參將兄汝鈞雍正元年武進士任江南廣德州守備夢熊雍正二年武進士授侍衛衛除浙江樂清營都司樂清兵悍民黨夢熊威惠兼施兵民安堵洊升福建延平協副將署建甯鎮總兵會老觀齋匪黨竊發夢熊剿平之調浙江杭州協副將遭內艱哀毀骨立扶柩歸葬未幾卒

名臣以上

丁允元字長仁日照人明天啓五年進士歷戶科給事中先是青州一帶錢糧繁雜民多破產允元疏請行條鞭法禁簽報民差以忤權相鐫級外調順治初知蘇州府以廉惠著稱兩閱試事所拔如徐元文乾學允侗繆彤章在茲蔣德峻皆極一時之選時庶務草創允元練習掌故因時釐正綱紀燦然升廬州道奉檄清丈廬

洲同時皆虛報畝數允元惟清欺隱均包占不虛益尺寸民立石頌焉時有邪教案株連頗冤濫允元極力平反全活者二千餘人卒以此失上官意坐解任後補榆林道以母老不就卒祀鄉賢

公家珍字明璧蒙陰人順治初以拔貢知襄城縣時殘破之餘流氛未靖家珍竭力拊循招徠復業者甚衆秩滿升黃州府同知高夢說字興嚴費縣人順治五年副貢任河南修武縣丞五攝縣篆軍需旁午酬應裕如時疆臣方勦除寇夢說職司糧運以功洊擢廣信知府三藩亂作大兵駐南昌夢說調辦軍需廣信參將柯昇乘機據城叛夢說聞警還據趙家阪昇來攻夢說率兵死拒會浙督李之芳駐兵三衢發勁旅赴援賊竄福建府城恢復於是練鄉勇殄土寇招流亡贖難民心力俱殫遷河東鹽道值歲饑多方調劑商賦得充後升江南按察使

秦珥字用肅日照人明尚書士文子士文以不拜魏瑞像有直聲珥順治初除推官以母老不赴丁憂服闋知山西太谷縣招流亡毀淫祠鋤強盜培士政教肅然遷知大同府以抗直謫歸著有鴻雪集

劉魯楹字孔植沂州人順治十五年進士授江西南安府推官時流徙滿境魯楹設法捐金救甦不可勝計監兌全省漕米州縣積弊剔除殆盡時有大獄株連頗衆魯楹平心研鞫釋無辜者百人丁泰字來公日照人順治十五年進士授陳留知縣時楚南未靖師旅往來供用不貲泰一意休養民免驚擾擢吏科給事中尋掌工科前後條議如嚴漕折清屯通弛海禁察侵欺皆當時急務乞

假歸里奉祀鄉賢

李兄龍蒙陰人康熙初知秀水縣布衣疏食刻苦自勵賦役驛遞皆有條理不以累民祀嘉興名宦

劉侃沂水人康熙三十九年進士順治初寓居維揚三歲失恃及長扶父輓歸葬哀感路人事繼母以孝聞成進士後授內閣中書遷刑部主事四十四年典試山西洊升禮部郎中出爲泉州府知府興學課士修文廟通饗溝文風不變修宋王梅溪貢西山二公祠及蔡文莊公清坊溶塘修橋升福建鹽運使泉州士民爲建講堂刻像於石理議政革陋規定鹽價商民悅服雍正元年以裁缺當改補四年赴都便道抵里以疾卒所著有檢身積德臨民須知及道德經註

丁士一字鸛薦日照人康熙四十五年進士知四川什邡縣升戶部主事遷御史巡按臺灣與民定禁約四條撫綏周至山番以次歸化采其俗繪圖二十四幅約束兵弁不爲民擾擢福建按察使晉江西布政使著有北遊日記春餘集三山詩草支筇集雙硯齋文稿

高淑曾字魯如沂水人明河南巡撫名衡四世孫雍正五年進士由蒙城知縣擢知六安州大減浮稅署潁州土賊劫掠立殲其魁霍邱有寡婦族人利其產斃其子而以重賄免淑曾廉得其情置之法遷常德府知府武陵令某貪縱酷虐淑曾具劾上官以初膺薦難之淑曾曰卽武陵民何辜上官不得已爲罷去淑曾亦以微故解職好爲詩與膠州高鳳翰相切劘格益進居繼母憂墓田丙

含聚書萬卷所著有雙介軒詩集

卜甯一字中三日照人乾隆四年進士改庶吉士散館授禮部主事乞假養母母歿服闋入都供職歷遷御史出任四川驛鹽茶道以鹽法三弊條陳大府力爲救正商民稱便兩署按察使多所平反署永甯道駐瀘州路通滇省三十三年總辦東路兵差以軍功晉級在蜀凡十三年治行第一遷順天府承兼督學政以病乞歸子祚光字凝子乾隆二十六年進士由編修出任陝西延安府延安素有虎患祚光懸賞募捕患遂絕署榆林道聽斷明決民蒙翁服擢潼關道釐剔關稅商民建生祠祀焉告終養歸

侯長熺字功安鄆城人乾隆三十年拔貢以知縣分陝西署隴州州同分駐關山長甯驛去州百里山徑崎嶇林木叢雜官此者視爲畏途長熺樂其幽僻作關山記上官卜某見之歎曰此意非宦海中人所能解卽其清操可知矣署洛陽縣署陽卽古棧閣值金川軍興日驅民馬應差長熺惻然曰署陽以馬耕奈何奪之卽日捐俸僱驢易馬民累永除略陽不務益長熺從沂購蠶種散給之民始知織著米脂神木榆林皆邊地民氣樸樸生計蕭索長熺爲清積通國鹽課設書院勸紡績土風一變調平遙民好訟長熺聽斷明決無留牘旋調稷山百姓尤愛戴之臂病百姓懷懼爲奔走禱祈其得民如此以疾歸里足不入城市著自考編凡出處行誼及聽斷獄辭悉載焉

劉鼎臣字調元沂水人乾隆四十六年進士任青安知縣縣爲古

民鼎臣興利除害知無不爲民和吏肅有巨竊雄於財羣小倚爲遁逃數懲治之一掃蕩安染瘴告歸居鄉勇於爲義丙午歲大寇散積粟掩暴骸收養嬰乳歲成俾各領去賴以全活者無算劉若蓮字聖友沂水人歲貢任連州州判山中有黨丁數千人擾害百姓若蓮奉檄履勘封禁山場民獲安堵防兵譁謾營弁不能禁若蓮諭以威德衆遂帖然土家築壩擅水利訟不已責其豪橫者撤毀私壩豪強斂迹江水暴漲壞民田督修隄堰民皆復業競勸石示不忘署連山縣卻訟者千金革弊俗以疾歸卒於家莊瑤字琪園莒州人嘉慶二十二年進士由工部郎中授湖北荆宜施道調河南彰德懷道拾護大隄堵築引河歷著績效諡民沿河種柳固隄工料皆取於民呼爲莊公柳以瘠乞歸咸豐十一年捻匪東竄總理沂郡鄉團倡衆修圩堅壁清野事未竣卒奉旨照軍營病故例賜卹贈太僕寺卿廕一子祀鄉賢子錫紱字晉階咸豐六年進士由刑部郎中授山西大同府知府丁母憂服闋補江西贛州府知府在大同時鎮兵爲折放馬乾鼓噪錫紱諭止之及守贛州息木商門稅之擾擄獲會匪渠目解散脅從民心以安卒於官

王慕麟字次厚費縣人道光元年舉人選招遠訓導保升知縣分發廣西署岑溪地連廣東民猶雜處奸民往往與猶構隙或誘之焚劫兵至則竄巖等莫可誰何慕麟力行保甲分良莠斷交結訴訟立決不馴者痛懲之皆帖然服廣東會匪竄踞邑之東山壘石據險攻莫能下慕麟募鄉導探山後徑夜遣勁勇猿引上黎明抵

其賊驚潰生擒匪目九殲從賊數百解散難民二千餘一邑獲安丁父憂服闋改河南尋卒弟嘉麟

嘉麟字孚吉道光十五年進士以知縣分江西補宜春調補臨川咸豐二年粵匪猖獗奉委赴龍川防堵勸民舉行團練爲定約束地方獲安五月賊犯南昌嘉麟協力守城圍解敘功以知府用尋署瑞州府知府時郡城初復嘉麟撫輯彫殘境內相定五年十月逆酋石達開率衆二十萬犯瑞州請援未至守兵單弱力戰不支城陷嘉麟投水左右拯之氣絕復蘇聞道赴省請兵奉

旨革職戴罪圖功六年官軍攻瑞州久不克七年兩江總督曾國藩來視師統帶湘後營劉騰鴻率衆急攻城且拔中礮卒嘉麟撫其裨將劉連捷曰我軍一退事去矣君等努力以慰主將在天之靈由是士無退志兩面夾攻城遁追殲殆盡城旋復時曾國藩方統軍圍吉安嘉麟曰吉安兩面傍水以舟師據上下游絕其接濟而於眞君山建礮臺居高下繫於山前開挖地道城可得也用其策果克之奉

旨開復原官九年請養回籍十年土匪起團練大臣杜鵬奏請以嘉麟督辦七屬團練同治元年沂郡肅清

賞道銜光緒五年己卯鄉舉重逢

賞按察使銜重赴鹿鳴筵客十年卒子肇賜

肇賜字子菴由附貢投效湘後營克復吉安府保知縣留江西補用以廉能稱奉新兩大姓構訟累年不解大府委之往兩姓爭納賄肇賜不受爲之平反時有青天之目旋補德安時匪亂未靖邑

多流亡戶少絃誦肇賜勞來安集民獲生息又復書院興文教時進諸生講學士風丕振初肇賜父嘉麟宰新淦時生肇賜於署中閱三十年肇賜復宰是邑在任九年克繼賢聲吉安劉修撰紀以詩有金川兩代舊恩留之句傳爲佳話升任景德鎮同知保知府在官日親族婚嫁無力者悉資助之自奉則甚約性好吟詠著有養吾眞齋詩稿

丁守存字心齋日照人道光十五年進士授戶部主事遷禮部郎中二十九年充廣西副考官三十年粵匪洪秀全肇亂隨 欽差大臣賽尙阿軍營差遣獲逆目洪大全派守存押解赴京獻俘途長犯狡心智交庖擢湖北督糧道兼署按察使督上書直隸總督慶祺論海防略曰戰之局在粵撫之局在滬津門密邇京師祇可言守於此言戰是背城之舉也挫傷國體勝非常策於此言撫是城下之盟也如意難盈拂意生變識者服其偉論掘泉篆時成大吉潰爲亂守存撫定之楚北以安富陽縣教匪滋事悉心平反全活多人退老家居修邑乘草創未就著有曠視山房文集造化究原火法本論等書

吳步韓字錦堂號小巖鄰城人道光十六年進士以知縣分直隸署深澤知縣建小蓮池書院署冀州知州裁冗員節經費補望都知縣案無留牘專志提倡文風爲一縣作嚴師丁父艱歸服闋改教職選兗州府教授時山東軍書旁午巡撫李鴻章奇其才使襄軍務同治五年卒於任步韓自少時名聞齊魯淮海間官轍所歷皆以文名積書數萬卷名人書畫數百幀古今碑帖鐘鼎文字各數

百種古硯百方有奇漢以來印章以千計客至極舉而談口如懸河暇則杜門翳然自遠視榮利泊如也性孝友居親喪淚至湧不能聲官俸悉以分給姊與弟卒之日無餘財惟圖書金石充架笥而已著有七十二硯齋集七岌山房集餘草蟲吟小草有是四端齋楹聯詩品印譜百石山房印存

申際清字乾一日照人道光十九年舉人爲長山教諭以內行勸士子訪貞烈婦女千餘人請旌建坊修忠義節孝二祠以母老歸養從父早世撫遺孤成立嘗爲節婦置田俾終身得所里居受徒貧者不取脩脯著有榆蔭堂文集雜則書畫雜誌於陵日記卒祀鄉賢

王殿麟字伯鸞費縣人慕麟再從弟道光二十五年進士以知縣分廣西歷署武緣昭平調降安是時髮逆之禍已萌游匪煽誘又界連土司催符叢集受害尤酷殿麟甫下車即馳赴土屬搜捕匪黨破巢擒渠屢有斬獲以祖母憂歸服闋改江蘇未赴咸豐季年捻匪竄張沂郡南鄙土匪倚其勢所在蠶起殿麟居東埠村案圩練鄉兵禦賊賊至輒擊卻之更聯迤北各鄉團連破耿家埠古城等處賊巢聲威大振旺山賊糾衆來攻圍其圩凡八晝夜督練兵丁擊之殲賊無算賊遁又有悍賊係化祥等奪據旗山距東埠僅八里與教匪幅匪相勾結其鐵賊力與之抗歷兵原野終日尋仇三年之中奇險萬狀賊滅敘功保監翎直隸州知州尋換花翎管知府卒子肇鼎自有傳

密雲路字仙坡蘭山人道光二十五年進士以知縣分浙江歷任

樂清臨海龍游錢塘蘭谿諸縣等縣知縣善治疑獄簡靜不擾咸豐初粵匪竄擾浙省戒嚴雲路適攝錢塘篆以練兵籌餉爲急務時近郊土匪蠶起雲路立擒爲首者杖斃之餘黨斂迹及沿蘭谿督辦民團聲勢大振值臺勇潛逃順流肆劫猝至城外雲路先伏義勇單身登其船詰所自衆驚愕失措遂擒獲五十餘名訊明正法境內肅清洊升金華府知府奉檄赴津卒於旅次著有澗蘭軒稿續羣輔錄敦德堂文集

孫錫輅字德輿鄰城人同治元年舉人咸豐之季土匪蠶起錫輅所居村曰馬頭爲一邑精華所萃匪類垂涎錫輅建議築圩圩成而匪大至以有備得無虞且助鄰圩守護里人德之馬頭北枕沂河同治十一年水暴至衝刷河隄勢岌錫輅率衆拍護獲安水退後集資築石壩以固永久又創建邑城考棚集款千餘金爲實興費與兄錫純錫光友愛巡恒顧其堂曰棟華里黨有聞牆者父老輒引棟華孫氏以悅勵之晚選聊城教諭卒於官子友蓮字幼青光緒二十年進士戶部主事咸豐九年捻匪突至父適館於外友蓮年甫成童扶母攜弟力行十餘里得免侍父教諭任所父卒扶柩回里間體母心官戶部時請假歸省母病不寐友蓮夜起數次飲食湯藥必躬自檢點母歿竟以哀毀致疾不起彌留時猶自責不孝云友光緒進士江蘇縣知縣

劉策先字甲三沂水人父恒泰字象九道光丁酉拔貢知萬載縣事下車受詞舊者兩造具備卽予判結新者詰其情虛當堂擲還捕伏發姦出人意表甚有懷姦欲試業經登號憚不敢上者縣素

健訟告期投愬率一二百紙行之一月減去大半及暮寥寥一二十紙而已邑中勢惡土豪盜賊惡棍無一不在其胸中因事到案立置重典由是強豪屏息歷任都昌大庾新淦等縣俱有政聲卒祀萬載名宦祠策先廩膳生咸豐辛亥制科孝廉方正由戶部主事改知府分發直隸值海氛逼天津經僧忠親王檄調前敵差遣十年 文宗幸熱河奉檄帶團勇駐黃村查拿土匪事定督擢道員統帶團勇入旗撥槍官兵及直隸練勇勦辦教匪克復曲周清河及山東莘冠等縣同治二年派充陸軍全營翼長統兵勦辦大股馬賊直東捻匪陣斬匪首張錫珠姚泰來並拿獲程順書李汝光等署清河道篆四年僧忠親王戰沒曹南山東軍事亟統帶所部駐紮阿城相機進剿速東省蕩平而西捻張總愚復由山西吉州渡河擾近畿奉調護守 西陵旋會同皖豫淮湘各軍扼守運河屢獲大捷畿輔肅清簡放湖北按察使時長江一帶水盜縱橫抵任後整頓保甲並親赴江干嚴查梭巡獲巨匪十餘人江面由此平靖記名提督沈鴻寶妄殺無辜詳請革職河南委員馬鳳瑞藉端招搖牽鄂省官員十餘人悉心研訊守正不阿論罪如律旋署理布政使十二年父喪回里遵先人遺志督率弟姪輩講求實學均先後登科第優游林下三十餘年卒年八十有二長子恩駐光緒乙亥制科孝廉方正丙子舉人直隸補用道孫長蔭補用知府以上循吏

許瀚字印林日照人道光十五年舉人歷任齊東縣教職助士子勵實行主講濟甯沂郡書院授諸生業原本經義訪先賢先儒

裔請立奉祀生尤篤好許鄭之書受知於高郵王引之道州何淡漢經學小學淹貫賅洽校刊桂氏說文義證著有攀古小廬集經說經韻詩文集轉注舉例卒祀鄉賢同邑丁 善字少山幼從瀚遊得聞說文及金石文字之學學政汪鳴鑾以學行俱優保獎翰林院待詔銜著有呂氏春秋校錄校勘仿宋說文解字仿宋翰苑集仿宋陶詩注仿唐石經凡例林儒

秦露字崑雪日照人生員自少厭俗學旁及象緯術數居常論天下事慷慨悲歌爲詩古文沈博饒麗成一家言徧歷登萊濟青淮海間與其賢豪遊所至皆倒屣恐後益都趙執信以詩招之有招攜采芝滄溟結隊之語著有東廬遺集一卷

丁晉字及菴一字憶慈日照人康熙六年進士授內閣中書大學士李蔚馮溥皆器重之里居日與同邑李公璇倡修邑乘凡有關風化者必致意焉遇戚黨婚喪貧不能舉及丁徭不能完納者出資助之晚年築萬松別墅二三知己唱酬其間著有半奎樓集蕭九成字詔亭日照人乾隆壬辰進士入詞垣山水守婁東法爲山左第一

丁愷曾字夢亭日照人雍正元年拔貢少負異才博極羣書入都名動公卿中年後絕意仕進閉戶著書築望奎樓架羅數千卷冥心探討嘗曰讀書一世應以得諸古者立萬世不刊之業卽不獲已而與陳編終老亦必發前人所未發俾後人得所依歸而後爲有功於世郡守延修府志矢公矢慎士林無異辭焉著有說書偶筆韻法本俗圓蓋管窺治河要語西海徵海曲一隅史讀書在目

煙波釣叟歌直解望奎樓詩文集以上文苑

李榮宗費縣人順治三年進士任垣曲知縣值大同總兵姜瓖反城陷榮宗死之

賜祭葬贈山西按察司僉事祀名宦

杜之棟郃城人明天啟四年舉人順治八年土寇入郃城之棟罵賊死

楊珍蘭山人順治三年以武生從軍積功至遊擊六年設直隸河南山東總督駐大名珍爲督標遊擊時土寇猖獗總督張存仁選勇士往招撫珍毅然將命挺身入賊穴諭以大義賊負固不服執之珍罵賊死

賜卹如例 國史有傳

袁振瀛沂水人道光九年進士官順天新民廳同知署開原知縣時匪騷擾焚劫徧四境前任所獲賊目復疊疊繫獄中振瀛甫蒞任倉猝變起振瀛殉焉奉

旨照四品官陣亡例議卹並於開原建立專祠

殷成德沂水人藍翎六品軍功咸豐八年隨沂州營赴江浦西關鎮防剿與賊力戰陣亡卹給雲騎尉世職

王肇鼎字象臺費縣人殷麟子增生性慷慨尙氣節博聞強識能爲詩古文詞咸豐末父殷麟築圩禦賊命統練勇司戰守先是蘭費各民圩爲逆匪恫喝多首鼠兩端莫知所向自肇鼎奮力擊賊各圩始克自立賊忌之甚辛酉五月秋家埠匪首李宗棠等糾衆圍蘭境北城子圩圩中使來求救肇鼎受父命督隊往援力戰解

圍乘勝逐北策馬直前從者不及賊自林叢中突出圍之乃下馬格鬪手刃數人賊用長矛攢刺遂及於難練勇昇其尸歸面如生事後大吏奏請祀昭忠祠贈雲騎尉世職蘭邑人士爲立紀功碑族人石風彭年克義均以禦賊死亦祀昭忠祠

王衛莒州人性剛直恒救人急難聞捻匪起豫籌防禦之策購製槍礮約鄉人入馬營山避難咸豐十一年八月匪突至衛與衆登山方及半賊追及衛令丁壯扶老弱速辟已獨當賊發礮擊之賊多傷未幾羣匪擁至衛被執死之同時王元吉朱立魯淮文厲聰皆被執罵賊死陳希儒以衛父死陳啓詰以衛母死劉文芳劉立基劉立業劉立恒又馬鏗先以是年三月擊賊殉難

袁炳堃沂水人以漸泰縣教諭丁憂回籍辦團咸豐十一年八月捻匪圍縣城炳堃督團勇赴援中途遇賊力戰陣亡同時邑人陣亡者歲貢李麟展增生劉家班附生何士恒高際盛

高殿揚沂水人武生同治六年捻匪至殿揚率鄉團登圩防守見賊逐難民甚急與弟業光督衆迎戰賊稍卻難民得脫俄而賊衆繼擁至均歿於陣卹贈外委同時生員張振江監生高文苑皆力戰死

左寶貴字冠亭費縣人咸豐六年由行伍隸江南軍營以功歷保花翎都司同治二年擢斬逆練苗沛霖擢遊擊四年科爾沁親王僧格林沁檄赴前敵管帶忠勇營六年赴直隸剿平捻匪加副將銜十一年追擊馬賊匪首周振升吳振英等於奉天擒巨匪王江等三十餘名匪衆潰散東荒肅清以副將儘先補用並加總兵銜

光緒元年隨刑部尚書署將軍崇實赴奉天是時大東溝木匠宋三好最猖獗恃其險遠夾山倚海內樹木城多置積斃戶匪高希珍等及湯溝逸匪皆歸之其際愈熾崇實檄貴督諸軍剿之匪三道分擾以相牽制總兵陳濟清追賊土門嶺突因賊伏資貴飛軍衝入立解重圍擒斬酋目及悍賊二百餘名乘勝追殺得三好誅之焚其木城積匪一清以總兵記名簡放並

賞銓色巴圖魯勇號嗣復勦廟兒溝金匪宮四焚其老巢多所捕斬追至二道江獲宮四及其餘匪首悉殲之以提督記名簡放二年至四年駐防奉天勦滅積寇奉境遂無賊蹤十五年授廣東高州鎮總兵仍留奉天十七年朝陽教匪起資貴躬先陷陣連破之斃匪千餘名事遂平

賞穿黃馬褂並頭品頂戴二十年中日戰事起資貴進兵朝鮮至平壤布置未定敵猝以衆數萬環攻資貴急與豐陞阿合軍奮力齊進敵敗退復由龍岡分道回攻資貴嚴督兵弁奮勇血戰躬踰礮臺左右轟擊雖屢受槍傷猶裹創指揮誓死抵禦忽飛彈洞胸歿於陣事

聞優卹贈太子少保銜

子祭葬諡忠壯給騎都尉兼一雲騎尉世職入祀昭忠祠 國史有傳

徐蘭桂武舉邵伯純傳祀贈皆生員陸登雲徐長清孫金吾皆武生王連奎把總彭永武外委馬步恆李祖愛王輝明孫世芬等三十九名俱蘭山人於咸豐同治間辦團禦匪與本邑團丁密克禮

李相林張揆姜輝吉張效端張鄧等二千一百八十三人同殉均請卹有案

徐淑翰王懷芳皆生員張永定六品翎頂俱鄰城人於咸豐同治間辦團禦匪與本邑團丁李客運梁玉璋劉乾元等一百七十四人同殉均請卹有案

孟凌雲貢生郭玉書把總齊光三郭麟書等六名俱莒州人於咸豐同治間辦團禦匪與本邑團丁趙正蘭劉在起等六百六十二人同殉均請卹有案

唐寶光訓導胡雅修生員張有德劉鴻爵等二十三名俱費縣人於咸豐同治間辦團禦匪與本邑團丁張起元唐錫訓等二百七十人同殉均請卹有案

劉兆明邵鳳高等一百八十二名俱蒙陰人於咸豐同治間以勇丁隨團長禦匪同殉均請卹有案

劉瞻雲生員張學顏等二十二名俱沂水人於咸豐同治間辦團禦匪與本邑團丁張夢鶴周子山等三百四十四人同殉均請卹有案

郭紹德貢生尹兆路郭元璽皆生員趙漢東武生郭殿揚孫公順趙華三趙萃等五十六名俱日照人於咸豐同治間辦團禦匪與本邑紳民尹聖中張發才趙漢章陳華尹敬一王福華郭仲達田正順李裁章李日桐李元六賀福起秦維方丁珊牟于祿牟崇發劉紳連永和胡連潘昭楊世連楊世傳徐正名徐士德秦馨許杠秦得鉅趙應隆梁貳蕭有存陳安李世仁盛連李玉高陸金衍近

韓名甲李蓉瑞王元恩鄭椿蘇振三胡听安維孫發起安林許珍
王桂一丁友善陳玉貴趙喜趙小徐松王會山魏瑄劉堂張仲九
劉桂春張在仁滕興崔受存高峯袁學彥王條申細焦興李和人
鄭有富左來福王連四潘復亭張俊陳大劉效武鄭當張文京袁
學深何振清張愿劉嵩古存進鄭訓等一千四百二十三人同殉
均請卹有案

忠義

陳嘉謨字獻廷沂州衛百戶親歿廬墓上官表其間委治衛屯開
有異績卒祀鄉賢

彭梓沂州人祖父皆客死浙閩梓痛哭數千里覓骸骨歸葬每祭
悲哀不輟同邑秦世瑛祖客都中死因葬焉父每以不歸親骸爲
恨臨終屬世瑛跋涉至都負骸骨歸比旋里背上皆成瘡痂

陳祚熙萬州人歲貢明季兵燹雙親殉難殯葬以禮倡修宮牆重
建啓聖祠卒祀鄉賢

仇儒楷郟城人五世祖雲慶親歿廬墓世稱雪廬仇孝子曾祖憲
言到股愈母疾儒楷母死廬墓旦夕哭奠負土築墳如雪廬故事
茅屋偏仄僅蔽風雨室中惟一矮腳几置書一册即仇孝子傳也
其歷世爲孝如此

王應仕郟城人康熙間地震應仕方待母食一子一女在側牽衣
號呼應仕不顧遽抱母奔出母驚憤扶持慰問者竟夜時廬宇傾
盡獨應仕家無恙又同邑汪應智早失怙事母至孝盜夜呼噪攻
母寢所應智冒白刃奔至大呼盜驚遁去又夜遭火警應智走護
其母火近母室頓息人以爲孝感

魏從海字涵字日照人數世合纂門內雍熙父早歿兄弟五人
母盡孝母疾侍湯藥衣不解帶者累月母歿廬墓負土築墳三年
如一日康熙丁巳秋夜大水暴至有二客避墓次相顧曰死此矣
恍惚聞空中語曰孝子居水不至已而水果退今名其地爲廬墓
林

卜煥字彤文日照人生員奉母至孝母年高命諸昆弟析爨煥泣
下不得已推肥瘠瘠歲時伏臘握手怡怡後年五十餘猶依依孺
慕慕陶靖節之爲人隱居海濱性愛菊花時與二三知己對花共
酌悠然自得尤耽吟詠以高談勝好汲引士類每聞一善言爲稱
說不置著有菊隱菴詩草子夢人號奎陽生有至性教子嚴而有
法著有海屋詩記夢人子甯一白有傳

尹懷恪日照人母病嘗憂知危割胸前肉煎藥進母病遂愈父卒
廬墓三年光緒十三年旌

孝友

王璵字宜兄沂州人順治十二年進士內閣中書康熙十六年充
順天鄉試同考官得王詰生以冠解額以母病告歸不復出璵未
第時遭明季之亂往淮陰依總兵閻某追賊於邳州之邢家樓賊
脅居民拒守既破賊閻怒將盡誅其俘璵力勸釋居民之被脅者
全活數百人後沂遭戊申地震又遭水災民多失所璵皆出糧倡
捐又上書當事請蠲賑鄉里感之而其事親之孝處友之義尤遠
近稱之噴噴不置焉

王卣字美公蘭山人生員康熙十八年
上南巡卣上疏獻二策一自黑陡澗至羽山二百餘里人煙稀少

草寇易聚當於郟城亂溝山集設捕盜官永除盜賊一充屬素不
匪柳每遇河工各州縣派柳千餘束散價百姓遠方買柳農事荒
廢乞自後散價於產柳地方兼於河隄內外廣植官柳十年之後
采用不盡大興鎮設官自此始並除沂郡柳東鄉人頌德不衰
安大觀日照人祖節備以枉死父重隨母萬氏擊登聞鼓冤獲伸
後成進士任大名知縣大觀貢生任鴻臚寺寺丞居鄉恤貧醫病
日照地民竈錯壤一地兩稅大觀爲呈請豁免卒祀鄉賢

劉應濂字慕周莒州人咸豐十一年捻匪至率衆避難於安邱城
頂山鄉人多相隨託庇以全時外郡縣被掠逃出者多誤爲賊應
濂遇之必核問詳明資遣歸里全活數十百人子樹倫咸豐十年
進士官戶部員外郎

以上
獨行

曹州府

葛斗南字梁公單縣人父亮諸生治尚書毛詩而以朱子小學爲
主人問讀史之要曰辨賢人君子進退得失程子所謂格物之一
也斗南康熙四十二年進士知山西山陰縣山陰地瘠民勞通賦
累累戶多流亡斗南盡除宿弊民困以蘇邑當孔道驛差繁費一
夫一馬不濫給是時軍事旁午散秩大臣某道出山陰赴軍前囑
驛道某索斗南厚餽斗南立揭兵部奉

旨獲二人職驛遞肅然復以牒告巡撫僕人擾驛政忤巡撫意數
檄鞫疑獄卒不能困工部侍郎王懿督散蒙古軍糧上官使斗南
偕行既至用戶部官斛蒙軍大譁斗南不爲動徐諭以法乃服任
山陰十年行取主事出爲長蘆運同升長蘆鹽法道衆商敬畏鹽

課無缺調山東鹽法道以本省人爲監司異數也擢四川按察使
內升右通政以母老乞歸卒於家

劉藻原名玉麟字慶兆荷澤人雍正四年舉人乾隆元年舉博學
鴻詞試列二等授翰林院檢討奉

特旨改今名是時海內晏安府庫充裕藻虞有以豐豫之說進者
凡園固燕遊費御之事皆剴切言之

上悉嘉納應遷內閣學士督江蘇學政以事鐫級調用補宗人府
府承以母老乞養歸十五年入都

賜內閣學士銜十九年丁母憂服闋授陝西布政使時方討準噶
爾叛酋阿睦爾撒納察哈爾吉林各軍及直隸山西四川協濟駝

馬並取道於陝軍需旁午并日視事役無遲誤民不煩勞明年調
湖北布政使升雲南巡撫二十七年著貴州巡撫加太子少保明

年回本任升雲貴總督先是雲南連京銅歲凡六運過峽值江漲
屢失事藻議併爲四運以避盛漲奉

旨依議雲南西南二面俱鄰緬甸西爲永昌南爲普洱時緬甸貴
家土司官裏雁與木疏曾戰敗竄孟坑其妻囊占率衆內附孟連

土司刀派春協取其資囊占怒殺派春永昌知府楊重穀遂誘誅
官裏雁囊占走緬甸諸土司犯邊藻馳至普洱遣總兵劉得成

等往勦而參將何瓊詔遊擊明詰守備楊坤遠節度擅渡九龍江
敗績藻據實卒言以三人戰歿入告未幾而三人自緬遁還藻不

自安當三人逗撓律而

上以三人乃臨陣退縮皆論斬降藻湖北巡撫藻益不自安以佩

刀自刎及部議至僅予革職而藻已前卒年六十有六著有篤慶堂集 國史有傳

劉義字先資單縣人援例爲直隸曲陽知縣廉幹著聲歷遷山西布政使乾隆四十八年擢廣西巡撫升直隸總督北河漕運歲僱剝船民以多累不肯應則改爲僉派弊益滋義奏定章程五條一輪轉以均勞逸一定限以免守候一僱值嚴禁扣剋一裝卸皆用官斛一截留以速回空又議造船一千五百以蘇物力至今爲永利五十一年大名有劫獄之案大名道熊恩綬同時被戕獲犯許三王國柱等據供係八卦教匪之黨以首犯未獲部議革職恩旨從寬留任五十五年內遷兵部左侍郎尋晉本部尙書五十七年扈

蹕熱河

賞花翎黃馬褂六十年以疾乞休

賞太子少保銜以原品致仕卒

賜祭葬諡恪簡 國史有傳

馬新貽字穀山荷澤人道光二十七年進士以知縣分發安徽補建平署合肥咸豐五年三月官軍圍攻廬州踞逆焦湖賊衆來援新貽擊走之旋敗賊於盛家橋三河鎮柘皋等處敘功以直隸州知州補用廬州克復

賞戴花翎超擢安慶府知府七年調廬州府捻匪糾粵匪竄陷桃鎮分擾上中派河新貽擊之賊舒城記名以道員用八年署安徽按察使賊犯廬州新貽督練勇出城迎擊賊問道入城新貽軍

潰遺失印信革職留任尋開復同治元年隨大軍復廬州追剿竄賊大捷於壽州之吳山廟加按察使銜尋署安徽布政使時方剿叛練苗沛霖新貽防守蒙城臨淮等處疊著戰功二年授安徽按察使旋遷安徽布政使三年升浙江巡撫奏言浙省甫經底定所有海塘工程農田水利整飭海濱水師懲治臺屬豪惡各事均關緊急自當妥籌辦理得

旨嘉獎浙江嘉湖兩府界連蘇省時有槍匪聚衆擄劫爲閭閻害新貽親赴嘉湖會督蘇省員弁獲首犯及悍黨數十名槍匪悉平四年擢浙閩總督七年調兩江總督充辦理通商事務大臣幅匪高歸等在山東江蘇交界處糾衆佔踞民圩肆行劫掠新貽派員擒首逆正法九年七月新貽赴甯道閱兵回署突遇人刺傷脇肋旋卒

諭加太子太保銜入祀賢良祠並於安徽立功地方建祠事蹟宣付史館十年三月兩江總督曾國藩奏新貽於丁憂回籍時值南捻北竄辦團築圩不避艱險卒能卻退悍賊洵屬有功桑梓懇於山東荷澤縣建立專祠七月浙江巡撫楊昌濬奏新貽在浙撫任內值地方新復加意撫綏辦理善後諸臻妥協並將海塘工程督修完固民賴以安請於浙江沿塘處所建立專祠並

允之尋

予諡端敏

賞騎都尉兼一雲騎尉世職子毓植襲 國史有傳

惠齡著戰功於漢中雙河流擒賊目涂世隴於巴州方山坪擒

白號首逆羅其清及其弟其書於通江麻城擒擒藍號首逆冉文

傳於開縣巨耳山擒黃號股首張建又隨參贊大臣德榜泰勦江

油踞匪於黃連壩大敗之於梓潼馬蹕岡擒偽元帥冉添元又隨

提督長齡勦川匪冉學勝於湖北竹山縣境勦黃號股匪曾芝秀

等於房縣學堂溝剿藍黃白等號餘匪於八卦廟勦股匪王廷

詔等於興山火石嶺勦另股賊匪於竹溪邊界草坪廟坪等處勦

黃號餘匪於竹溪王家山崗勦陳姓股匪於竹溪椒子園等處勦

苟文明股匪於房縣仙家坪背夾嚴仙女山及房坐交界之大草

塘均大捷擒斬無算獲著名匪首張世舉熊文秀八年秋三省

漸次肅清濟勝積功由外委累升湖北鄖陽鎮標遊擊

賞西哩德克巴圖魯勇號並戴花翎十五年升江南蘇營參將

調江蘇撫標中軍參將十八年直隸長垣教匪滋事延及豫東兩

江總督百齡奏派濟勝督兵勦捕屢敗賊於冉垌集潘家堂及曹

縣劉家樓一帶獲賊百李名揚匪目趙其淵趙普位等多名殲其

衆升江南河標中軍副將二十年擢河南河北鎮總兵道光三年

擢浙江提督四年調福建陸路提督十二年臺灣逆匪張丙糾衆

肆擾戕害官兵遂圍嘉義臺灣鎮總兵劉廷斌嬰城守鹿港一帶

文報不通濟勝帶兵渡臺馳援奮勇剿擊圍立解追至笨港尾大

敗之擒股首詹通等六名進屯鹽水港會同劉廷斌進剿擒逆首

張丙及匪目謝成等六十餘名

賞戴雙眼花翎十三年正月嘉義平

賞給二等男爵世襲

賜御書忠勇嚴明匾額是年冬入

覲謁二等子爵十六年卒於任

諡賜祭葬晉贈太子太保諡昭武

國史有傳

侯靖宸字竹梅鉅野人恩貢生孝友著宗黨明季海水草飛賊相

戒勿犯其里初任儀徵訓導豪商與諸生訟懷金以謁指江水督

之遷偏陽教諭會淮海將帥勦湖陵劇寇多連染士民靖宸毅然

詣軍前自無辜者聲淚俱下全活數百人官至大嵩衛教授著有

桃柳山房詩集

南洙源字生魯濮州人明崇禎十年進士授大名府推官平滑濬

間巨寇以功陞南兵曹出守保定府擢井陘兵備道甫抵任遭甲

申之變問道歸里順治初起用官至湖廣左布政使祀鄉賢

周會隆字梅菴濮州人明崇禎三年舉人順治初授安遠令縣在

萬山中時常寇亂戶口寥寥會隆多方招徠聚居至一二千家賊

衆不時剽掠會隆勦撫互用歷三載境內以甯升建昌府同知尋

解組歸所著有臥遊草山野經籍錄爲人金鑑集藏於家

鞏錦字素絲濮州人順治二年舉人署單縣教諭時曹南未設府

治單舊隸兗郡毗連皖蘇極稱難治東撫詢單利弊錦對井井有

條遂破格飭署知縣事位兼官師紳耆皆相助爲理任事十有二

年治屢稱最暮年告歸杜門謝客著有鐘鳴詩集

張元鎮字翰白單縣人順治三年進士知宿遷縣丁父艱服除補

上虞縣山田磽瘠值大旱元鎮爲文檄城隍雨立應歲以大稔土

寇據巖險爲巢穴時出剽掠鎮將統兵至期盡殲之元鎮曰大兵至賊膽落矣宜撫之不悔禍用兵未晚也乃單騎詣賊壘宣示朝廷威德賊皆羅拜聽命全生靈以萬計上官某有所屬元鎮自恃廉白拂其意遂抵拾不根語罷其職時此獄者爲按察使某元鎮同年生也素銜元鎮輕已雖事皆無實而獄不得竟嗣某以不檢敗後至者白之事乃得釋還里年才過壯不復出讀書吟嘯與宗族故人修孝友睦鄰任卹之行以終餘年卒於家

朱虛字若虛荷澤人順治三年進士初令衡水稱循良第一擢監察御史巡視中城時

朝廷有寬令凡出師所俘婦女聽家人回贖巨奸豪猾多冒買轉入娼籍虛請嚴其禁力勸強橫不避權貴又疏請漕運河夫照舊額僱役旋按陝西兼學政定試額拔寒賤會停按差改浙江叅議遷廬州兵備副使著毛詩箋古今疏于園集行世卒祀鄉賢

李悅心字澹遠曹縣人順治三年進士授行人擢御史疏劾尙書李待問職舉朝憚之旋巡按甘肅攝篆昌學政利興弊革風裁凜然轉山西兵巡副使乞休歸著有染柳軒集修獻錄

祝喻字完真城武人順治四年進士知福建龍溪縣海賊闖城喻多力捍禦食盡人無叛志卒退賊後卒於任士民思之

馮達字希上濮州人以貢爲山西清源知縣多惠政遷四川漢州知州清源民乞留不得爲立生祠漢州經流賊殘破後無炊爨者幾百里達至勸課招徠異方多趨之後以罪謫罷官達幼時其生母爲繼母所遺居潘陽恆思一私親之畏父與繼母嚴不得間比

罷官而生母已卒號慟走千里尋其骨解衷衣裹之負以歸子朝綱康熙十二年進士官印江知縣革除陋規治尙寬大鄰邑有以邪教相煽者事發印江人多所連染朝綱爲委曲省釋全活百餘人後謝病歸家無餘財以上壽終

孫光祚字孟裕范縣人明萬歷四十六年舉人順治初任保定知縣歲荒請賑不待報而發廩時方辦圍地事光祚躬履田畝民得不擾遷戶部主事監臨清倉權北新關悉公平仁恕卒祀鄉賢

李長慶字善有郟城人順治十六年進士知新興縣招集流亡七百家邑無逋賦沿山多盜率兵深入剿之撫數千人境內帖然升鳳翔府通判擢延安府同知攝神木道事德威並著邊境肅清卒祀鄉賢

蘇金鉉漢州人順治十七年舉人生平學宗朱子爲壽光及靖海衛訓導師範嚴整教士必先行後文選國學助教與纂修會典升兵部督捕主事皆有聲稱以親老告歸敦宗睦族廣置義田卒祀鄉賢

李惟一文字原鉅野人康熙五年舉人知臨淮縣初淮民納賦以制錢千二百文抵銀一兩惟一爲減制錢百文耗銀亦不溢取分毫淮漲城幾沒惟一晝夜露處城上督民堵築水不爲害調常熟禁輯吏役民尸祝之

李敦字厚夫鉅野人康熙二十三年舉人授中書改壽陽知縣壽陽爲山陝孔道差徭旁午錢糧加耗素重敦至令民以加一封投紳民咸其意正賦不督而集編審人丁皆按戶親稽里胥無得蒙者

民大歡如釋重負富民某者僕盜其貲而訴其主敦廉得其實卒論僕如法民戴之如父母每至一鄉民爭以茶果爲獻敦爲講孝慈睦鄰等事俗益厚訟庭爲虛攝平定州數月紳民戴之如壽陽行取主事壽民號泣追送平定之民亦如之以病乞歸卒

徐鳴珮單縣人以拔貢任江南鹽城知縣調廣東信宜縣縣地初闢民多梗化鳴珮單騎詣村壩諭以國法渠魁歸附再調江南婺源捐資刊布紫陽綱目又爲朱子裔孫名坤者請襲博士升山西保德州知州旋里敦倫睦族鄉里化之卒祀鄉賢

武若愚字智齊曹縣人明太僕卿岡功五世孫乾隆七年進士任華陰知縣邑有巨盜盤踞山谷間出沒靡定人莫敢擾若愚至率衆捕其魁戮之散其黨民獲安塔掘西安府知府摘發如神時有武青天之稱卒於任祀名宦著有四書論文學庸解要署服偶扞若干卷

田鈞字若谷鉅野人乾隆五十一年舉人由安邱教諭遷鎮洋知縣值海匪蔡牽窺伺洋面大吏檄鈞署寶山賊至鈞燃礮焚賊二舟賊不敢犯移知洛川山多田少勸民開墾修龍洞渠渠高於涇設隄障涇數潰決鈞相度形勢疏鑿之民獲永利爲立生祠著有治平輯覽詩古文若干卷

張人龍字雲門濮州人乾隆五十一年舉人以大挑試署四川樂至知縣值教匪猖獗川北州縣半遭蹂躪人龍招鄉勇繕城隍竭力守禦邑獲安堵繼權壁山壤接巴隍寇盜往往資爲巢穴人龍督練勇擄其巢擒斬殆盡匪相戒不入境補南充調成都時寇氛

漸息人龍謂邪匪滋熾由正學不明捐廉倡修芙蓉書院延名師主講案牘之暇親蒞講習人文蔚起成都人爲立生祠升署石阡知府歷著政聲以內艱歸送者填巷莫不流涕卒後祀四川名宦劉毅單縣人父天眷康熙二十九年副貢爲中書科中書存擢刑部郎中持心寬恕多所平反監督大通橋別除倉弊告歸卒祀鄉賢毅諸生援例授內閣中書遷江南池州府同知職司詰盜毅明察案無留牘羣小屏迹奉委赴膠州監修戰船與夫役同甘苦又囑已田得千金以助賸修之無力者數月工竣上官稱其能檄攝懷甯縣故事錢糧經銀匠封投官用重秤收入而責匠補虧匠登多取之民毅至悉依部頒法馬徵收弊遂絕值江溢壞民田廬毅往勘步行泥淖中具牒請賑全活甚衆奉檄丈廬洲嚴寒行濱江數百里正其界限以才守兼優調知廣德直隸州卒於官著有秋浦路亭江湖琴臺四集子汝霖員外郎長松湖南永州府同知姚體備字誠叔鉅野人道光二十六年進士以知縣分發江西二十七年署德安值水災請賑未報先貸錢數千緡給之民沾實惠十月粵匪黃毛五等竄逼江西體備奉檄防南安賊不敢犯咸豐三年署新淦粵匪由皖江圍逼南昌距淦數十里體備嚴設守禦會楚師來援賊乃颺去四年丁母憂服闋署崇仁條議四事一禁擾害以絕亂源一阨險要以固衆志一爭先著以伐狡謀一破常格以收奇功當事睦之改署廬陵廬陵爲吉郡首邑體備統領忠清軍水陸千人駐守郡城九年粵匪由楚窺江旋由衡山覬覦府體備慨然曰賊不入蜀禍猶小一入蜀禍有不可勝言者駐蓮花

臨塔禦與賊相拒數月賊蹤漸遠乃撤防兼署吉安府通判捐廉助餉以知府用十年賊又由楚粵逼江西急招勇馳赴龍泉塔禦十一年正月賊趨祁門五月徽州賊竄陷縣逼祁門體備謂總兵唐某曰大局安危在此一戰事急矣君其努力唐感奮遂會老湘營迎擊大挫賊城復撤賊棄城遁會國藩奏保以器識恢宏不憚艱險請以道員留安徽補用江西巡撫亦以深明治體兼諳兵畧奏保遂署徽甯池太廣道係陳時事六則一曰安民一曰保境一曰察吏一曰用賢一曰招懷一曰收恤大府皆採用之同治元年八月出巡嶺外感疾歸卒於任經曾國藩奏准照軍營立功後病故例

賜卹贈光祿寺卿銜蔭一子以知縣用弟體休體份體休自有傳體份字秩軒咸豐九年舉人援例爲兵部員外郎改官知府分發江西歷署臨江南安二府南安郡鄰境客民雜處俗悍難馴體份實力舉行保甲約束嚴明民獲安堵同治初乞假歸里時捻匪仍肆竄擾體份率衆築堡守禦悉出家財佐餉賊不敢逼父卒廬墓哀感行路卒於家子多字筱浦廩生歷官戶部主事直隸楊村通判三品銜候補知府

高士字則可鉅野人由武進士授廣東連州守備逆搖作亂士分隊討之與戰而敗僞墜馬爲折足狀昇歸營密選善走者二百人腰斧柯入山樵探高聲歌唱搖聞之爭出二百人皆棄斧柯走下山士與子懷古率卒三百伏山下殺搖畧盡未敘功以病告歸被服如諸生飲酒賦詩終其身

以上
補更

房應辰字樞天荷澤人諸生篤專正學究心濂洛關閩嘗言朱子集諸儒之大成章句集註爲四書指南或問語類又暢言之非熟玩深體豈能有得力詆姚江一時學者皆知步趨朱子而不敢習異說以相高著有素菴詩文稿子毓樵字如璠康熙五十四年進士能以經學世其家知廣昌縣清惠得民見上官爲民陳利病慷慨形詞色不少屈左遷順德府經歷趙魏之士多來受學毓樵梓程氏讀書分年日程人給一編與諸生講說程朱宗旨廓清陸王二家之言精融曉暢識者推爲宋儒嫡派著有四書困學編

傅米石字立元號練溪鉅野人康熙五十二年舉人奉母能色養博極羣書篤嗜程朱力駁王氏從遊者多以通經稱與兄玠石弟岱石有三傳之稱義不苟取妻因喪子代爲置妾米石亟呼女之父母至折券遣之後舉三子著有春秋說左傳解練溪詩集從兄瑛石雍正七年舉人莒州學正著四書集說學庸集解毛詩說從弟玠石乾隆十七年舉人教授鄉里皆有名於時子爾德字金樵乾隆七年明通榜授嶧縣教諭告歸奉親曲盡色養母歿廬墓三年其學達於性理以程朱爲本而力排陽明古文法昌黎詩宗杜陵與滋陽牛運震膠州法坤宏昌樂閭循觀單縣朱次筠並稱著有南遊集養疴集蘇學集左夢堂集金樵詩鈔

以上
補錄

魏希徵字子相鄆城人康熙十五年二甲一名進士改翰林院庶吉士授編修升侍講充會試同考官主順天鄉試以清謹稱卒祀鄉賢

鄒麗中字敬東鉅野人雍正五年進士改庶吉士歷官鄭州信陽

州知州多善政以鄒州命案坐故出人罪落職戍松陽以贖歸里乾隆元年起廢選寶慶府通判自陳親老改判彰德卒於任甌中讀書探本原不爲章句學文名振東國大學士陳世瑄撫山東時特聘主書院講席一時俊髦皆出其門居松陽五年主講松川書院人士咸慶得師

文苑

黃立誠字居業曹縣人明崇禎間舉人甫登賢書聞母訃號泣徒跣歸因摘孝經論語題爲九孝文自訟著匪我篇前後二集嘗還遺金三百兩於逆旅贖良家女於道上順治五年李化鯨陷城立誠抗節罵賊遇害

王光昱觀城人少有智略善騎射明季土寇起撫按委辦團練多所保全甲申闖逆僞官至欲盡殺紳緒光昱與歃血盟東門下事遂寢順治初流寇猖獗鄰邑多陷觀城無恙皆光昱守禦功也薛世瑞字執公范縣人順治初歲貢知江西龍泉縣時不逞之徒多竄名營伍肆行焚掠世瑞每見被掠者輒多方求出之請緩催科以蘇民困後值金聲桓之變城陷被執不屈死祀龍泉名宦張佩荷澤人勇敢好義順治初土寇倡亂迫脅黨逆佩不從糾合里中壯士千餘人保境待援築堡深溝竭力抗禦民輟安枕者數月忽羣盜夜至佩率衆拒戰敗乘勢追殺後隊不繼賊自暗中出鉤仆之遂被害

武輅字三畧曹縣人順治三年武進士二甲第二人除山西蒲州營參將五年大同總兵姜瓖叛六年五月賊薄蒲州輅身先士卒開門迎戰大敗之賊悉衆來犯城外軍民悉爲賊脅從城中兵不

滿八百輅誓以死守與城中文武分門拒敵叛黨通賊啓關輅轉戰出重圍適官舟來迎渡河入秦輅泣曰封疆失守不死非忠也有母在而棄之非孝也願決死戰再入重圍殺賊百餘力竭被執罵不絕聲遂遇害 國史有傳

王瑣單縣人官曹州營把總嘉慶二年從征陝西教匪隨總兵慶溥擊賊於金家山陣亡卹給雲騎尉世職子攀騰襲 國史附楊伏國傳

姚體休字逸軒鉅野人體備弟廩生咸豐五年河決銅瓦廂時皖匪方蹂躪蒙亳穎壽間因涉乾河窺東境鉅野首當其衝體休以諸生家居條陳十二事上之當事當事奇其才檄委總辦團練遂與同邑舉人馮錫介教職田品三荷澤貢生李少泉舉人牛汶東金鄉貢生邵金義生員田竹坡等各集丁壯申明約束劃分東西中三路相爲犄角而郛城李錫魯趙康侯曹縣袁燭及同縣魏篤皆響應八年九月賊由馬梁北竄體休號召南路諸團禦之十月賊竄考城又率東路諸團禦之賊忿兩次俱未得逞十一月賊集蘇添福劉添祥大集捻股直犯金鄉之孟家鋪時各團均未至惟邵金義田竹坡兩營駐紮周家蓮池與體休相距五里方會商詰朝兩路迎擊而賊偵體休營孤立棄明率衆二萬張兩翼來攻復東出一股綴邵田兩營使不得西援地勢平衍無險可據體休力戰自辰至午度事不可爲怒馬陷陣死之事聞照把總例卹給雲騎尉世職子舒鵬襲舒鵬武生以軍功遞保至遊擊加副將銜補授文登營都司